

PRAYER

- Sa inyong grupo, ipagdasal na patuloy kayong bigyan ng Diyos ng kalakasan at kakayahan upang gawin ang mga bagay na magbibigay-puri sa Kanya.



Honor God. Make Disciples.

Karapatang Pag-aari © 2010 ng Every Nation Leadership Institute
Inilathala ng EVERY NATION PRODUCTIONS
P.O. Box 12229 Ortigas Center, Pasig City, Philippines

FILIPINO

Ningas Cogon

Week 4

NOTES

CONNECT

- Anong masasabi mo sa kasabihang, “Tumingin muna bago tumalon?”
- Ano ang mga gawain na tinatapos mo araw-araw? Bakit mo ito ginagawa?
- Ano ang nakaeengganyo sa iyong tapusin ang isang proyekto o gawain?

WORD

WHAT

What does the Bible say?

Sabihin ninyo kay Arquipo: “Magpatuloy ka sa paglilingkod na iniatang sa iyo ng Panginoon.”

Colosas 4:17

Layunin nating tapusin ang isang gawain at hindi lang basta simulan ito. Ngunit alam din nating mahirap talagang ugaliin ang magtapos palagi ng sinisimulan. Buti na lang at binibigyan tayo ng kakayahan ng Diyos pati na rin ng mga praktikal na hakbang upang matapos nating mabuti ang lahat ng ating gawain. Papaano mo ba gustong maengganyo sa pagtapos ng iyong mga gawain?

- **Bilangin at alamin ang halaga.**

²⁸“Sino sa inyo—kung ibig magtayo ng tore—ang hindi muna nag-iisip kung may sapat siyang itutustos sa ibig niyang ipatayo? ²⁹sapagkat pagtatawanan siya ng mga tao kung hindi siya makakayari pagkatapos niyang gawin ang pundasyon. ³⁰Sasabihin nila, ‘Nagpasimulang magtayo ang taong ito ngunit hindi nakayari.’”

Lucas 14:28-30

Ang ating pananampalataya bilang Kristiyano ay simple lang naman. Ispirituwal ito ngunit praktikal din. Tulad ng nasasaad sa talata, inuutusan tayo ng Panginoon na bilangin ang halaga at kalakip na rito ang maiging pagpapalano at pagkonsulta. Sa anong paraan mo mapapanatili ang iyong pananampalataya habang nagpapalano at naghahanda?

- **Gawing layunin ang mainam na pagtatapos sa mga gagawin.**

Nakipaglaban akong mabuti, natapos ko ang aking takbuhan, naging tapat ako sa pananampalataya.

2 Timoteo 4:7

Si Apostol Pablo ang dapat nating sundan bilang isang taong nagtapos ng maigi sa kanyang pananampalataya. Makikita ito sa kung papaano niya tinugunan ang mga gawain niya sa pagpapalano at sa pagtapos sa mga ito. Ang totoo’y sa Roma 15:23-29, makikita na walang kapintasan ang pananampalataya at pagiging praktikal ni Pablo. Kaya tulad niya, dapat rin nating maging adhikain ang pagtapos ng maigi sa lahat ng aspeto ng ating buhay. Ano ba ang ibig sabihin ng magaling na pagtatapos?

- **Ang pagpaparangal sa Diyos ang pinakadakilang adhikain.**

¹²Hindi ko sinasabing natamo ko na iyon. Hindi pa ako ganap. Subalit nagpapatuloy ako upang matamo ko iyon, dahil ako’y kay Cristo na ngayon. ¹³Mga kapatid, hindi ko inaakalang naabot ko na ang buhay na iyon. Ngunit isang bagay ang aking ginagawa: nililimot ko ang nakalipas na, at nakapako ang aking mata sa unahan. ¹⁴Tuwid ang aking pagtakbo patungo sa hanggahan upang matamo ko ang gantimpala—na walang iba kundi ang pagkatawag sa atin ng Diyos kay Cristo Jesus sa buhay na walang hanggan.

Filipos 3:12-14

Sa talatang ito, makikitang hindi inisip ni Apostol Pablo na narating na niya ang kanyang layunin at tapos na siya sa kanyang adhikain. Alam niyang laging may puwang pa para sa paglago at pagbabago. Habang kinakalimutan ang mga natamo na niya noon, patuloy siyang nagsumikap na makatapos pa ng mas marami. Ang nag-uudyok sa kanya ay hindi ang makasariling mithiin kundi ang kagustuhan niyang maparangalan ang Diyos (Filipos 3:12-14). Sa anong paraan mo mapaparangalan ang Diyos sa iyong buhay?

SO WHAT

What is the relevance of the Word to my life?

- Sa iyong karanasan, ano ang karaniwang nag-uudyok sa iyo na sumabak sa isang gawain na hindi muna iniisip ang halagang kailangan para dito? Ano ang nagpapahirap sa iyo na magplano?
- Anong halimbawa ng isang malaking proyekto o gawain ang pinanindigan mong tapusin kahit anong mangyari? Ano ang nag-uudyok sa iyong gawin ito?
- Sa anong paraan mo mapaparangalan ang Diyos habang ginagawa mo ang isang layunin?

NOW WHAT

How do I apply the Word to my life?

- Magbigay ng isang gawain na kailangan mo ng simulan agad. Ano ang dapat mong gawin upang masimulan ito sa mga susunod na araw?
- Alamin ang susunod na hakbang para sa isang gawaing hindi mo natapos. Alamin mo rin ang dapat mong gawin upang maipagpatuloy ito sa lalong madaling panahon.
- Anong kagandahang loob ang iyong magagawa ngayong linggo upang maparangalan ang Diyos? Ano ang pinaplano mong gawin?